

par maniere de dire, non seulement de l'esprit pour en cōprendre les raisons, mais aussi des mains mesmes, autāt que leur grādeur le pouuoit souffrir. tesmoins entr'autres ce grād roy de Syracuse, Hieron: Demetrius, roy d'Asie: & Adrian, l'vn des plus illustres empereurs Romains. outre ce que tous ces grands seigneurs anciens pour la plus-part n'ont pas moins perpetué leur memoire par le moyē des ciseaux des ouuriers dont nous admirōs auuiourd'hui les ouurages ruinez, que par les liures des doctes & bien difans historiens. Et quant à ce qu'estant si petit, i'ose m'adresser à vous, Monsieur, deux choses me garentiront de ceste faute: ascauoir vostre humain & gracieux naturel, & l'excellence de celuy duquel ie vous presente vn ouurage auquel ie m'asseure, (selon que j'ay cognu vostre vrayement noble & gentil esprit encliné à telles estudes) que ne prendrez moins de plaisir pour la subtilité & commodité des inuentions ici contenues, que plusieurs en pourront tirer proufit, les mettant en pratique. Cependant, afin que quelqu'un ne pense que ie face mes monstres, & me pare des plumes d'autruy, ie vous presente avec les figures des machines qui sont de l'auteur, la declaration d'icelles, sans laquelle elles seroyent à la verité comme vn corps sans ame, à l'endroit de plusieurs. Que si Dieu eust faict ceste grace à l'auteur du liure de luy donner plus longue vie, il ne faut douter que l'œuure ne fust sorti de sa main beaucoup mieux poli & accompli en toutes ses parties. Si est-ce que j'ay esperance que ma peine en cest endroit ne sera iugée par gens à ce cognoissans, ni petite ni vaine: vous suppliant treshumblement, Monsieur, de prendre en gré ce mien petit labeur, & souffrir que vostre illustre nom luy serue de frontispice, comme d'une tresheureuse rencontre pour le faire trouuer meilleur. à toutes gens equitables, & le preseruer des calomnies de tous enuieux. De Basle, ce premier d'Octobre, 1578.

VOSTRE SERUITEUR TOUTE SA VIE,
FRANCOIS BEROALD.

